

金匱玉函經二註
射



金匱玉函經二註卷之七

趙以德衍義

元和李清俊燦華校刊

周揚俊補註

慈谿洪明光旭照叅校

肺痿肺癰咳嗽上氣病脉證治第七

論三首脉證四條方圭首

補註

嘉言云金匱於肺痿肺癰二證則徹土綢繆治

之於蚤然先從脉辨其數虛數實次從口辨其吐沫

乾燥然更出一捷要之法謂咳嗽之初即見上氣喘

急者乃外受風寒所致其脉必浮宜從越婢加半夏

之法及小青龍加石膏之法亟爲表散不爾即是肺

癰肺痿之始基。故以咳嗽上氣病證同敘於肺癰肺痿之下。而另立痰飲咳嗽本門。原有深意見。咳而至於上氣。卽是肺中壅塞逼迫難安。尙何等待。不急散邪下氣以清其肺乎。然亦分表裏虛實爲治。不當誤施。轉增其困矣。

再論肺癰肺痿之病。皆燥病也。肺稟清肅之令。乃金寒水冷之藏。火熱熏灼。久久失其清肅。而變爲燥。肺中生癰。其津液全裹其癰。不溢於口。故口中辟辟然乾燥。肺熱成痿。則津液之上供者。悉從燥熱化爲涎。

沫濁唾證多不渴較胃中津液盡傷母病累子之痰
又大不同祇是津液之上輪者變爲唾沫肺不濡其
惠澤爾若失痰病津液不能滅火反從火化累年積
歲肺葉之間釀成一大火聚以清涼投之扞格不入
矣然雖扞格固無害也設以燥熱投之以火濟火其
人有不坐斃者乎半夏燥藥也投入肺中轉增其患
自不待言但清涼既不能入惟燥與燥相得乃能入
之故用半夏之燥入清涼生津藥中則不但不燥轉
足開燥其濁沫隨逆氣下趨久久津液之上輪者不

結爲涎沫。而肺得濡其漬潤。痿斯起矣。人但知半夏能燥津液。孰知善用之。卽能驅所燥之津液乎。此桂蘊也。

總按肺爲嬌藏。肺氣素爲形寒飲冷而受傷。久久出汗過多而不瘥。氣餒不振。卽爲肺痿。其風傷皮毛。熱傷血脈。風熱相搏。氣血稽留。遂爲肺癰。肺痿多涎沫。乃至便下濁沫。肺癰膿血。乃至便下膿積。凡胃強能食而下傳者。皆不死也。夫血熱則肉敗。營衛不行。必將爲膿。是以金匱以通行營衛爲第一義。欲治其子。

先建其母。胃中津液尤貴。足以上供而無絕乏。後世諸方錯出不一。不明大意。今閱金匱十五方。固已用之不盡矣。

問曰。熱在上焦者。因咳爲肺痿。肺痿之病。從何得之。師曰。或從汗出。或從嘔吐。或從消渴。小便利數。或從便難。又被快藥下利。重亡津液。故得之。曰。寸口脈數。其人咳。口中反有濁唾涎沫者何。師曰。爲肺痿之病。若口中辟燥。欬卽胸中隱隱痛。脈反滑數。此爲肺癰。咳唾膿血。脈數虛者爲肺痿。數實者爲肺癰。

補註按嘉言云、人身之氣、稟命於肺、肺氣清肅、則周
身之氣、莫不服從而順行。肺氣壅濁、則周身之氣、易
致橫逆而犯上。故肺癰者、肺氣壅而不通也。肺痿者、
肺氣痿而不振也。纔見久咳、上氣先須防此兩證。肺癰由
五藏蘊崇之火、與胃中停蓄之熱、上乘乎肺、肺受火
熱薰灼、血爲之凝、痰爲之裹、遂成小癰、所結之形漸
長、則肺日脹而脇骨日昂。迺至咳聲頻併、痰濁如膠、
發熱畏寒、日晡尤甚、面紅鼻燥、胸生甲錯、始先卽能
辨其脈證、屬表屬裏、極力開提攻下、無不愈者。迨至

血化爲膿。肺葉朽壞。傾囊吐出。始識其證。十死不救。嗟無及矣。間有癰小氣壯。胃強善食。其膿不從口出。或順趨肛門。或旁穿脇肋。仍可得生。然不過十中二三耳。仲景治法最精。用力開提於未成膿之先。今人施於旣成膿之後。其有濟乎。肺痿者。其積漸已非一日。其寒熱不止一端。總由胃中津液不輸於肺。失其所養。轉枯轉燥。然後成之。蓋肺金之生水。精華四布者。全藉胃土津液之富。上供罔缺。但胃中津液暗傷之竇最多。粗工不知愛護。或腠理素疎。無故而大發。

其汗。或中氣素餒。頻吐以傾倒其囊。或痺或消中。飲水而渴不解。泉竭自中。或腸枯便秘。強利以求其快。漏卮難繼。只此上供之津液。坐耗岐途。於是肺火日熾。肺熱日深。肺中小管日窒。咳聲以漸不揚。胸中脂膜日乾。咳痰艱於上出。行動數武。氣卽喘鳴。沖擊連聲。痰始一應。金匱治法。貴得其精意。大要緩而圖之。生胃津。潤肺燥。下逆氣。開積痰。止濁唾。補真氣。以通肺之小管。散火熱。以復肺之清肅。如半身痿廢。及手足痿軟。治之得法。亦能復起。而肺近在胸中。呼吸所

關可不置力乎。肺癰屬在有形之血，血結宜驟攻。肺痿屬在無形之氣，氣傷宜徐理。故癰爲實，誤以肺痿治之，是爲實實；痿爲虛，誤以肺癰治之，是爲虛虛。此辨證用藥之大畧也。然兩手寸口之脈，原爲手太陰肺脈，此云寸口脈數，云滑數，云數實數虛，皆指左右三部統言，非如氣口獨主右關之上也。其人咳，口中反有濁唾涎沫，頃之遍地者，爲肺痿。言咳而口中不乾燥也。若咳而口中辟辟燥，則是肺已結癰，火熱之毒出現於口，咳聲上下觸動其癰，胸中卽隱隱而痛。

其脉必見滑數有力。正邪氣方盛之徵也。數虛數實之脉。以之分別肺痿肺癰。是則肺痿當補。肺癰當瀉明矣。

問曰。病咳逆。脉之何以知此爲肺癰。當有膿血。吐之則死。其脉何類。師曰。寸口脉微而數。微則爲風。數則爲熱。微則汗出。數則惡寒。風中於衛。呼氣不入。熱過於榮。吸而不出。風傷皮毛。熱傷血脉。風舍於肺。其人則咳。口乾喘滿。咽燥不渴。多唾濁沫。時時振寒。熱之所過。血爲之凝滯。畜結癰膿。吐如米粥。始萌可救。膿成則死。

補註按嘉言云肺癰之脉既云滑數此復云微數者非脉之有不同也滑數者已成之脉微數者初起之因也初起左右三部脉微知其衛中於風而自汗左右三部脉數知爲榮吸其熱而畏寒然風初入衛尙隨呼氣而出不能深入所傷者不過在於皮毛皮毛者肺之合也風由所合以漸舍於肺俞而咳唾振寒茲時從外入者從外出之易易者若夫熱過於榮卽隨吸氣所入不出而傷其血脉矣衛中之風得榮中之熱畱戀固結於肺葉之間乃致血爲凝滯以漸結

爲癰膿。是則有形之敗濁。必從瀉法而下驅之。使其邪毒隨驅下移。入胃入腹入腸。再一驅。卽盡去不留矣。安在始萌不救。聽其膿成而腐敗耶。

上氣。面浮腫。肩息。其脉浮大不治。又加利尤甚。

補註肺爲氣之總司。主呼吸者也。今云上氣至於面浮腫。至爲肩息。是其肺氣壅逆。而肩爲動搖矣。何也。肺之所畏者火也。設中焦邪實。阻其升降。而炎上之性。有加無已。則所呼之氣。邪有以助之。而所吸之氣。不復下達。遂使出入息肩矣。加以脉浮大。火勢方張。

本體既衰，而邪削更甚，又何法可令其內還而下趨乎？故不治也。然猶有可圖者，庶幾中土尙培，生氣未絕耳。若加利爲尤甚也。

上氣喘而燥者，屬肺脹。欲作風水，發汗則愈。

補註 同一上氣也。此則作喘而不息肩者，正以皮毛乃肺之合，爲邪所蔽，遂令肺氣不得外達，故寒傷營者，亦作喘也。彼燥陰也，上氣何以復燥？肺氣既塞，遂令下流不化，水既不化，又令木氣不疏，此皆以母病而兼及於子也。一發其汗，則塞者得以外通矣。逆者

得以下達矣。故曰愈也。

肺痿吐涎沫而不咳者。其人不渴。必遺尿。小便數。所以然者。以上虛不能制下故也。此爲肺中冷。必眩。多涎唾。甘草乾薑湯以溫之。若服湯已。渴者。屬消渴。

甘草乾薑湯方

甘草

四兩

乾薑

二兩

炙

炮

右二味以水三升。煮取一升五合。去滓。分溫再服。

補註

嘉言云肺熱則膀胱之氣化亦熱。小便必亦澀。

而不能多。若肺痿之候。但吐涎沫而不咳。復不渴。反。

遺尿而小便數者。何其與本病相反也。必其人上虛不能制下。以故小便無所收攝爾。此爲肺中冷。陰氣上巔。侮其陽氣。故必眩。陰寒之氣凝滯津液。故多涎唾。若始先不渴。服溫藥卽轉渴者。明是消渴。飲一溲二之證。更當消息之矣。

愚按肺寒上虛也。便數下虛也。聖人只溫其中。豈非以補其母。則子自安。總司之地溫。而膀胱亦溫。下泉無冽彼之患矣。

欬而上氣。喉中水雞聲。射干麻黃湯主之。